

YOB

Yob, Zaj 1

Xas Tas sim Yob siab.

1 : 1 - 3 + 6 - 22.

1 1 Puag txheej thaud, nyob Ws Xaws teb, muaj ib tug txiv neej hu ua Yob. Nws yog ib tug neeg siab ncaj thiab ua ncaj ua ncees, nws hwm Tswv Ntuj. Nws zam kev txhaum.
2 Nws yug tau xya leej tub thiab peb leeg ntxhais.
3 Nws muaj xya txhiab tus yaj, peb txhiab tus ntxhuav, tsib puas nkawm nyuj, tsib puas tus luj. Ntxhais txib tub txuas los nws muaj coob kawg.
6 Muaj ib hnub Tswv Ntuj cov tub tuaj cuag HUAB TAIS, Xas Tas kuj nrog lawv tuaj thiab.
7 HUAB TAIS hais rau Xas Tas tias : "Koj mus qhov twg lod ?"
Xas Tas teb tias : "Kuv mus ncig ua si hauv ntiaj teb los."
8 HUAB TAIS hais tias : "Koj puas nco pom kuv tus tub txib Yob ? Nyob ntiaj teb, tsis muaj lwm tus zoo cuag li nws. Nws yog ib tug neeg ncaj, nws tsis muaj ib qho xyeej thiab nws hwm Tswv Ntuj, nws tsis ua phem !"
9 Ces Xas Tas teb zoj tias : "Tos Yob hwm Tswv Ntuj yog vim nws tau zoo. 10 Koj twb cog xyoob ntoo thaiv nws vaj tse, thaiv nws tej liaj teb dav tas. Koj foom hmoov zoo rau nws tej hauj lwm, nws cov tsiaj huam vam puw lub teb chaws. 11 Yog koj rhuav nws lub cuab tam tas, mas kuv yeej cog lus tau tias nws yuav ntxeev siab, nws yuav tsawm koj nyob ntawm koj xub ntiag."
12 HUAB TAIS hais rau Xas Tas tias : "Ua li lod ! Koj xav ua dab tsi rau nws lub cuab tam kuj tau nyob ntawm koj

siab. Tab sis koj tsis txhob kov nws ." 13 Hnub ntawd Yob cov tub thiab cov ntxhais tab tom mus noj nqaij haus cawv tom tus tub hlob tsev, 14 muaj ib tug khiav tuaj fi xov rau Yob tias : "Koj cov nyuj tseem tab tom laij teb, cov luij nog zaub nyob ntawm ib sab, 15 ib sij huam cov Xas Npes cia li tuaj muab cab mus tas lawm. Lawv xuas ntaj tua koj cov tub txib tas tshuav kuv ib leeg thiaj dim khiav los hais rau koj xwb."
16 Tus xa xov tseem hais lus, txawm siv muaj lwm tus khiav los txog ntua, nws hais tias : "Tswv Ntuj tso hluav taws poob saum Ntuj los hlawv koj cov yaj thiab cov neeg tuag tas. Tshuav kuv ib leeg thiaj dim los hais rau koj xwb."
17 Tus ntawd tseem hais lus txawm siv muaj dua ib tug los hais tias : "Muaj peb pab Kas Ntes tuaj nyiag koj cov ntxhuav tas lawm. Lawv xuas ntaj tua koj cov tub txib tuag tas. Tshuav kuv ib leeg dim los hais rau koj xwb." 18 Nws tseem hais lus, twb muaj dua ib tug khiav los hais tias : "Koj cov tub thiab cov ntxhais tseem tab tom noj nqaij haus cawv tom koj tus tub hlob tsev. 19 Muaj ib nthwv cua hlob hlob cia li tuaj ntsawj lub tsev, ces tsev vau los tsuam lawv tuag tas. Tshuav kuv ib leeg dim los hais rau koj paub xwb."
20 Ces Yob sawv tsees dua rhe nws lub tsho, nws mus chais plaub hau. Nws da hauv av, nws hais tias :
21 "Kuv tawm hauv kuv niam cev los kuv liab qab. Kuv yuav liab qab rov mus hauv av. Txhia yam uas HUAB TAIS pub rau kuv, nyem no nws rov qab sau rov mus tas. HUAB TAIS lub npe nto

koob meej !"

22 Yob raug kev txom nyem npaum li cas los nws tsis ua txhaum li, tsis kam cem phem txog Tswv Ntuj.

Yob tsawm hnub nws yug los.

3 : 1 - 3 + 11 - 17 + 20 - 23.

3 1 Yob qhib ncauj tsawm lub hnub nyooq nws yug los. 2 Nws hais tias :

3 "Thov kom hnub kuv yug los ploj mus. Thiab hmo uas qhia tias ib tug tub nyuam qhuav xeeb los, thov kom hmo ntawd yaj ntshis mus. 11 Kuv kheev lam tuag thaum nyob nruab thiab. Thaum kuv yug poob nthav cas kuv txoj sia tsis tu ? 12 Tim li cas thiaj muaj ob lub hauv caug los cug kuv, ob lub mis los pub kuv ?

13 Yog txhob muaj li ntawd mas ntshai nyem no kuv twb pw ntsiag to, tau zoo puag tes puag taw so tsaug zog.

14 Kuv twb mus nrog ntiaj teb tej vaj, tej nom tswv nyob ntsiag to hauv lawv tej ntxa zeb lawm. 15 Kuv twb tau nrog cov tub vaj ntxvv nyob hauv lawv tej tsev nyiaj tsev kub lawm.

16 Kheev lam kuv zoo li tus me nyuam nchuav los tsis puv hli, thiab zoo li cov me nyuam uas tsis tau pom lub ntuj.

17 Kheev lam kuv tau mus nyob hauv lub teb chaws uas tsis muaj neeg siab phem ua ntxhov hnyo, kheev lam kuv tau mus nrog cov neeg sab so nyob ntawd.

20 Tus neeg txom txom nyem, thiab tu siab loj tas npaum no, ua cas yuav hu nws los nyob ntiaj teb no ?

21 Xav tuag los tuag tsis taus. Ntshaw hnub tuag mas tseem ntshaw tshaj ib thooj kub.

22 Yog thaum twg paub tias pawg av ntawd yog lub qhov ntxa, mas yuav zoo siab. Yog hnub twg kuv tau mus nyob

hauv ntxa, mas ntshai yuav zoo kuv siab.

23 Tim li cas thiaj muab txoj sia rau tus neeg uas nrhiav tsis tau nws txoj kev tuag ? Tim li cas yuav muab txoj sia rau tus uas Ntuj pub ib daim ntawv tsis zoo rau nws ?"

Yob yws, vim nws raug txom nyem.

7 : 1 - 4 + 6 - 7.

7 1 "Ib tug neeg ua hauj lwm nyob ntiaj teb no, nws tsis zoo li ib tug tub txib xwb lod ? Nws lub neej tsis zoo li ib tug neeg ntiaj zog xwb lod ?

2 Kuv zoo li ib tug qhev ntshaw mus so nyob hauv qhov ntxoov ntxoo. Kuv zoo li ib tug tub zog tos nws tus nqi zog.

3 Kuv tos ntev hli, kuv tsis tau raws li kuv tos. Kuv nyob ntau hmo hauv kev txom nyem.

4 Yog kuv pw saum kuv daim lev, kuv hais tias thaum twg thiaj yuav kaj ntug ? Kuv nyuam qhuav sawv, kuv hais tias : ceeb laj tos txog tsaus ntuj. Kuv lub tswv yim ntxhov, xav ub xav no mus txog thaum lub hnub poob qho.

7 HUAB TAIS, thov koj nco tias kuv lub neej tsuas ntev li nqus ib pas cua xwb. Thov koj nco tias kuv yuav tsis tau rov pom txoj kev noj qab nyob zoo. 8 Txij no mus, neeg qhov muag yuav pom tsis tau kuv ntxiv, kuv yuav ploj mus. Tsuas tshuav koj lub qhov muag thiaj yuav ntsia ntsoov kuv xwb."

Yob xav tias Tswv Ntuj lub tswv yim loj dua neeg lub.

9 : 1 - 12 + 14 - 16.

9 1 Yob qhib ncauj hais lus li no :

2 "Qhov tseeb tiag mas kuv paub tias neeg cav tsis yeej Tswv Ntuj.

3 Leej twg sim khav mus nrog Tswv Ntuj

sab laj saib, ib txhiab zaus Tswv Ntuj twb
tsis tau teb nws ib zaug.

4 Tswv Ntuj lub siab thoob tsib, nws lub
zog loj. Leej twg yuav cav yeej nws ?

5 Tswv Ntuj ua kom tej roob tej hav
tshais chaw tau, nws tsis xub nug lawv.
Thaum nws npau taws, nws muab lawv

nphau. 6 Nws diaj lub ntiaj teb kom ua
zog, nws qaij cov ncej txheem lub ntiaj
teb. 7 Yog nws txwv lub hnub mas lub
hnub yuav tsis tawm tuaj. Nws yuav
thaiv cov hnub qub tsis pub lawv ci kuj
tau. 8 Yog nws nthuav lub ntuj nyob
saud, yog nws ua kom tej roob vau los ua
hiav txwv.

9 Tswv Ntuj tsim lub hnub qub kaj ntuj,
thiab tsim txhiaj txiv mim.

10 Yog nws tsim tej yam loj yus ntsuas
tsis tau, nws tsim tej yam zoo tas nrho.

Yus suav tsis thoob. 11 Tab yog nws hla
saum kuv, los kuv pom tsis tau nws, kuv
tsis hnov nws. 12 Tab nws nqa ib yam
mus, leej twg yuav cheem tau, tsis muaj
leej twg muaj cuab kav hais tias : koj ua
dab tsi ?

14 Ua cas kuv tseem yuav nrhiav lus teb
rau nws thiab ?

15 Tab kuv txawm muaj cai npaum twg,
los teb tsis tau dab tsi. Kuv kawg yuav
thov tus uas txiav txim rau kuv kom nws
hlub kuv xwb.

16 Yog kuv hu Tswv Ntuj, nws teb kuv,
kuv tseem ntseeg tsis tau tias nws puas
yuav mloog kuv lub suab ?"

**Yob tso siab tias Tswv Ntuj yuav
tsa nws sawv nyob ze Tswv Ntuj.**

19 : 21 - 27.

19 21 Nej uas yog kuv cov phooj
ywg, nej hlub kuv mog ! Yog
Tswv Ntuj txhais tes ntaus kuv. 22 Vim
li cas nej tseem nrog Tswv Ntuj ua nyuaj

siab rau kuv tsis txawj tag thiab ?

23 Kuv xav kom muaj ib tug sau kuv
cov lus cia ! 24 Kuv xav kom nws muab
rab txaug hlau thiab tus cwj mem los
txaug kuv cov lus nyob hauv ib daig txiag
zeb, cia rau saum phab tsua kom nyob
mus li.

25 Kuv paub tias tus txhiv kuv nws muaj
txoj sia, hnub kawg nws yuav sawv tsees
los txiav txim rau lub ntiaj teb.

26 Thaum kuv yuav xeev rov los, mas
nws yuav tsa kuv sawv nyob ze nws, ces
kuv cev nqaij yuav tau pom Tswv Ntuj.

27 Tus kuv yuav pom, yog kuv ib tug
swm neeg. Tus kuv qhov muag yuav
ntsia, tsis yog ib tug quha.

Tswv Ntuj ntuas Yob.

38 : 1 + 8 - 21 + 40 : 3 - 5.

38 1 HUAB TAIS nyob hauv nag
xob nag cua teb rau Yob tias :

8 "Thaum cov dej hiav txwv txhawv
hauv tiv txwv nroo ntws tawm los, yog
leej twg muab cov dej hiav txwv kaw
thiab xov ? Puas yog koj ?

9 Thaum kuv tso ib co huab dawb los
ua tsho vov lub hiav txwv, koj nyob qhov
twg ? Thaum kuv tau ua tej twv huab dub
los npog lub hiav txwv, koj ua dab tsi ?

10 Thaum kuv tu ciam teb rau dej kom
txhob hla, thiab kuv tsa ntsa zeb ntsa tsua
xov lub hiav txwv, koj nyob qhov twg ?

11 Thaum kuv tau hais rau cov hiav txwv
tias : koj yuav tsis txhob mus dhau qhov
no. Koj cov dej nphau muaj hwj chim
ntxiag, yuav tsum nyob twj ywm ntawm
no, mas thaum ntawd koj nyob qhov
twg ?

12 Nyob hauv koj lub neej, koj puas tau
hais ib zaug kom lub ntuj kaj thaum sawv
ntxov ?

13 Koj puas tau hais kom lub hnub tuaj

ziab lub ntiaj teb thiab tuaj kub cov neeg
siab phem ?

14 Koj ua puas tau kom hnub tuaj zas lub
ntiaj teb liab tas zoo li zas tsoos tsho ?

15 Koj ua puas tau kom lub hnub tuaj rho
qhov pom kev ntawm cov neeg siab phem
mus tsoo sab npab xav tua neeg ?

16 Koj puas tau mus txog lub hauv dej
hiav txwv, thiab mus yos nyob hauv qab
thu dej ?

17 Koj puas tau pom cov qhov rooj mus
hauv tub tuag teb. Koj puas tau pom cov
qhov rooj mus hauv teb chaws tsaus
ntuj ?

18 Koj puas paub me ntsis tias lub teb
chaws dav li cas ? Yog koj paub tas tej
no, mas koj hais.

19 Lub hnub nyob sab twg ? Qhov tsaus
ntuj nyob qhov twg ?

20 Koj coj puas tau qhov pom kev, thiab
qhov tsaus ntuj rov mus rau lawv tej chaw
nyob ?

21 Yog koj paub tej ntawd, mas yog vim
koj xub nyob dua qhov pom kev. Yog li
ntawd mas koj nyob ntev xyoo kawg !

40 3 Yob teb rau HUAB TAIS tias :

"Kuv lam tau lam cav xwb ! Kuv
cov lus tsis tseem ceeb dab tsi ! Kuv yuav
teb dab tsi rau koj ?

4 Kuv yuav muab tes los npog kuv qhov
ncauj, kom kuv txhob cav koj ntxiv.

5 Kuv tau hais ib zaug. Kuv tsis hais
ntxiv lawm. Kuv tau hais ib zaug, Kuv
tsis rov hais zaum ob ntxiv."

**Tswv Ntuj rov pub txoj hmoov zoo
rau Yob. 42 : 1 - 3 + 5 - 6 + 12 - 17.**

42 1 Yob teb HUAB TAIS tias :

2 "Kuv paub tias koj muaj hwj
huam tas nrho. Koj xav dab tsi koj ua tau
tas. 3 Kuv yog tus muab koj tej lus sib
xyaws tas, kuv hais tej lo lus tsis muaj
ntsiab. Kuv lam kwv yees hais tej yam
loj loj uas kuv tsis to taub thiab kuv tsis
paub.

5 Thaud, kuv paub koj vim kuv hnov
luag tej hais xwb. Tab sis nyem no, kuv
paub koj vim kuv tau pom koj lawm.

6 Ua li mas kuv rov thim kuv cov lus,
kuv them txim nyob hauv plua av thiab
plua tshauv."

10 Ces HUAB TAIS rov hlub Yob.
HUAB TAIS rov tsa Yob nyob hauv txoj
kev vam meej.

12 HUAB TAIS foom hmoov zoo rau
Yob lub neej tshiab kom tau zoo dua yav
thaud. Yob muaj nto 14,000 tus yaj,
6,000 tus ntxhuav, 1,000 nkawm nyuj
thiab 1,000 tus luj.

Nws yug tau xya leej tub thiab peb
leeg ntxhais. 14 Tus ntxhais hlob hu ua
Me Nkauj Nquab, tus nrab hu ua Me Tsw
Qab, tus peb hu ua Me Kub Rau Tshuaj.

15 Nyob thoob hauv lub teb chaws tsis
muaj ib tug poj niam zoo nkauj npaum li
Yob cov ntxhais. Lawv txiv kuj faib cuab
tam rau lawv ib yam li faib rau cov tub.

16 Yob zoo los, nws tseem ua neej ntev
txog ib puas plaub caug xyoo. Nws tau
pom nws cov tub cov nyab, pom nws cov
tub xeeb ntxwv mus txog phaj plaub.

17 Nws tau ua neej ntev niaj ntau xyoo
txaus nws siab, ces nws mam li tuag.